

四庫全書

史部

欽定四庫全書

續資治通鑑長編卷七十四

宋 李燾 撰

真宗

大中祥符三年秋七月戊寅朔壬子清昭應宮紫微殿上
梁車駕往觀焉 廊延路鈐轄張崇貴言蕃落居民以
秋成穫田遣兵戍境上上曰此蓋慮德明反覆耳辛巳
遣使撫諭緣邊守將仍詔崇貴防遏之策使回言德明

境內歉旱嘗為輝和所侵德明率所部將劫輝和種落故遣人守境土也 詔三司市木以茶酬直者自今悉給緡錢

戊子尚書左丞參知政事馮拯以疾賜告表求罷任優詔不許拯再上表亦不許遣中使促其入復賜手札諭旨又命宰相王旦就第敦勸拯乃起視事

己丑三司假內藏庫絹二萬匹從之

癸已知益州任中正言羈縻霸州刺史董忠義卒子當

繼襲緣尚幼族人請以忠義從弟延昊領州事上曰夷落中父亡子繼朝廷舊制也蓋絕其僥倖使知有定分今易此制必貽後患乃立其子許以近親左右之

乙未廊延路都鈐轄李繼昌等言准詔減駐泊兵九指揮臣等慮邊防失備望且仍舊上曰趙德明方稟朝化必無事端致生侵軼邊臣殊不以飛輓勞民為意可即依前詔

去年七月乙丑實錄已載此事此必重出但聖語稍不同今亦兩存之

丙申戶部尚書溫仲舒卒贈右僕射己亥以尚書右丞

兼祕書監向敏中為工部尚書資政殿大學士上曰溫仲舒若在當並命矣歎惜久之因錄二子為校書郎歸葬日令緣路巡檢兵護送置龍圖閣學士以直學士杜鎬為之待制陳彭年為直學士又詔龍圖閣學士在樞密直學士上給俸如之詔南宮北宅大將軍已下各赴書院講讀經史諸子十歲以上並須入學每日授經書至午後乃罷仍委侍教教授伴讀官誘勸無令廢

情此乃壬寅日事懃與祀汾陰相間今依本紀移入辛丑前

辛丑文武官將校耆艾道釋三萬餘人詣闕請祀汾陰
后土不允表既三上

八月丁未朔詔以來年春有事於汾陰先是上命陳彭
年等討尋歷代修廢后土故事出示宰相曰前史謂郊
天而不祀地失對偶之義朕既升中太山臚上之祭要
不可闕而河中父老亦再有斯請然封禪甫畢遽行此
禮得不以地遠勞費耶咸曰陛下為民祈福不憚櫛沐
聖心始定固已達於神明矣上曰但冀民獲豐稔於朕

固無所憚也 封長樂郡主女趙氏為成紀縣君趙氏
普之孫燕國長公主之外孫有司言國朝以來郡主女
未有封爵之制特命之 左龍武大將軍韶州防禦使
分司西京韓崇訓卒

戊申以知樞密院事陳堯叟為祀汾陰經度制置使翰
林學士李宗諤副之堯叟權判河中府宗諤權同知府事
樞密直學士戚綸昭宣使劉承珪計度轉運事綸尋出
知杭州以龍圖閣待制王曙代之客省使曹利用西京

左藏庫使張景宗供備庫使藍繼宗修行宮道路河
北轉運使右諫議大夫李士衡鹽鐵副使戶部郎中林
特提舉京西陝西轉運司事士衡又獻錢帛三十萬以
佐用度詔褒之

己酉發陝西河東兵五千人赴汾陰給役置急脚遞鋪
出廐馬增驛傳遞鋪卒增置八千四百五十人

庚戌命翰林學士晁迥楊億龍圖閣學士杜鎬直學士
陳彭年知制誥王曾與太常禮院詳定祀汾陰儀注

御史中丞兼工部侍郎王嗣宗罷為耀州觀察使知永興軍府兼兵馬部署上將西幸以京兆重地思得大臣才兼武者鎮之因謂宰相曰嗣宗嘗自言知武事可授廉車使當此任宜先召問觀其意既而嗣宗願奉詔即命之又作詩賜焉詔汾陰路禁弋獵不得侵占民田如東封之制

辛亥給昇州公用錢歲千貫舊制五百貫時張詠知州故優之江南旱詔轉運提點刑獄官疏理所部繫囚

壬子遣內侍鄭志誠江德明分徃昇洪潤州撫問軍民
犒設將校耆老及祀境內山川以久不雨屢有火災故
也

甲寅詔近臣觀書龍圖閣上閱元和國計簿三司使丁
謂進曰唐朝江淮歲運米四十萬至長安今乃五百餘
萬府庫充牣倉庾盈衍上曰民俗康阜誠賴天地宗廟
降祥而國儲有備亦自計臣宣力也謂再拜謝又觀國
初已來所獲瑞物于崇和殿史官晁迥楊億曰此皆聖

朝受命之符不可不載於史冊望內降名件付修國史院上許之遂宴于崇政殿上作詩從臣皆賦 鎮戎軍請於軍東北十五里築寧遠堡以弓箭手守捉從之

丁巳詔寶鼎縣不得答蕃人有罪並送府區遣 渭州吐蕃部署縛克宗來貢馬縛克宗自言本屬西涼府及為李繼遷所破遂徙居康古初以馬二百餘入貢至天都山與萬資太保相值劫而奪之但餘三十匹又言德明境內荒歉其鄰近族帳爭博糴糧斛作破樓糾集兵馬期

取甘州及與吐蕃相殺云

北據會要在八月實錄正史俱不書今附見戊午日前更

須考之

戊午徙鎮定路鈐轄曹瑋於涇原路代楊懷忠時趙德明率所部出大里河築柵蒼耳平興永平界蕃部相劫殺故令瑋制禦之

庚申解州言池鹽不種自生其味特嘉取其精明尤異者上進詔遣使祭池廟

辛酉給鄆州牧馬草地還民以東封路所從出優之也

癸亥鄜延都鈐轄張崇貴言得趙德明書稱遣牙校貢馬無言延州熟戶明愛屢侵其所統綏州臣疑其有詐遂遣戍兵小校防守境上德明果以三千兵來寇兵未至又遣所部貿易於邊郡及兵至臣所遣戍兵出其不意逆擊之德明尋遁去自德明納款累省屯軍今請復益之以備防遏遂詔鄜延環慶涇原路各增兵馬既而德明上表自訴明愛所侵界事詔荅之

德明訴明愛所侵界實錄在明

年正月

甲申

甲子令河中京兆府陝同華州今年秋稅納外見欠並
權倚閣之淮南饑詔罷諸州和糴減直糴廩米及賑
貸貧民所在繫囚遞減一等盜殺食者量行論決賜
大理評事蘇耆進士及第耆易簡子宰相王旦女婿也
耆先舉進士及唱第格在諸科知樞密院陳堯叟為上
具言之上顧問旦旦却立不對耆曰願且修學既出堯
叟謂旦曰公一言則耆及第矣旦笑曰上親臨軒試天
下士示至公也旦為宰相自薦親屬於冕旒之前士子

盈庭得無失體堯叟愧謝之曰乃知宰相真自有體至

是嘗獻所為文召試學士院而有是命

八月甲子日事旦答堯叟據遺

事錄

旦長女婿殿中丞韓億後亦嘗獻所為文上亟欲召

試旦力辭之億例當守遠郡上特召見改太常博士知
洋州旦私語其女曰韓郎入川汝第歸吾家勿憂也吾
若有求於上他日使人指韓郎緣婦翁奏免遠適則其
為損不細矣億聞之喜曰公待我厚也洋州豪民李甲
者兄死迫嫂使嫁因誣其子為他姓而專其貲嫂屢訴

官甲輒賂吏掠服之積十餘年訴不已億視舊牘未嘗

引乳醫為證乃召甲出乳醫示之甲無以對寃遂辨億

雍丘人也

億遷殿中丞緣祀汾陰恩其進文及改一官知洋州當是四年以後事今且附此

乙丑遣入內都知秦翰齎詔汾陰勞賜陳堯叟等遂往

西面經度邊事仍諭廊延環慶涇原路部署得翰移文

即發兵應之尋以翰為河西兵馬鈐轄及翰至蕃落安

堵如故兵不復出翰即還行在

翰為河西鈐轄實錄在戊辰日今并書之翰即

還行在據翰本傳

令西京葺後唐莊宗廟

丙寅詔陳堯叟祭西海又遣中使於三亭渡等處祭河以渡河舟車闕咽故也

丁卯羣臣詣閣奉表加上尊號曰崇文廣武儀天尊道寶應章感欽明上聖至德仁孝不允五表卒不允

戊辰以江淮不稔命昇揚廬州長吏各兼本路安撫使時刑部郎中王濟知洪州躬督官吏為糜粥日親嘗而給之錄饑民為州兵所全救甚衆陳堯叟言昨將至陝州傳言稍旱苗稼甚薄及入境親見實不至此但人

慮有差役以此為言耳已各面諭及移牒轉運司勿得擅有差役民間聞此皆望闕歡呼至有感泣者

己巳詔自京至應天府曹濟單蔡許汝賴陳澶濮淄青州廣濟軍並增巡檢兵捕賊使臣及令寄班忠佐提領之

庚午詔如聞汾陰路勾當官除州縣供頓外別取索准備物宜令一切禁止先是皇城司遣親事卒四十人於京城伺察月給緡錢每季代之凡所察事悉上本司

本司皆錄奏上慮其恐喝騷擾於是令樞密院條約之
自今非姦盜及民俗異事所由司不即擒捕者勿得以
聞 陳堯叟言曹利用等稱陝鄭衙署正門低小街衢
窄隘若將駐蹕望別降朝旨上曰但仍其舊勿以勞人
辛未命曹利用祭汾河 有司定封玉冊玉匱制度廟
廷擇地為埒中置石匱匱方五尺厚二尺中容玉匱刻
金繩道三闊一寸深五分繫繩處刻深四寸方三寸五
分容天下同文寶俟祀畢太尉奉玉匱置其中將作監

領徒舉石蓋厚一尺繫繩填泥印寶悉如社首封礮之制皇帝省視訖又加蓋其上封固如小壇廣厚五尺從之滑州言大河順道北流詔遣官致祭

壬申廢儀州太泉嶺寨以乏水也

癸酉陳堯叟言河中府管內秋苗茂盛穀價至賤芻一圍四錢仍擷禾菽以獻

乙亥河中府父老千七百人詣闕迎駕上勞問之賜以緡錢帛舊制假日閤門無辭見之例上以其衆遠來特

引對遣還 自京師往河中府有二路一由陝州浮梁
歷白徑嶺一由三亭渡渡河司天保章正賈周言二路
巖險湍迅不若出潼關過渭洛二水趨蒲津地頗平坦
雖興工不過數十里事下陳堯叟等請如周所議而渭
水當同州新市鎮多灘磧自此稍南而西紆行十數里
狹處可連舟為橋又洛河上亦為浮梁直抵河中復以
稠桑舊路緣崖西南有峭壁或霖潦多摧圯乃徙路自
靈寶縣南入虢州路至函谷關與漢武廟前舊路相合

九月丙子朔上幸左承天祥符門觀上梁賜從官襲衣金帶役夫緡錢有差改舍芳園為瑞聖園

戊寅詔西路行宮宜令儀鸞司止用油幕為屋以備宿衛不須覆以蘆竹

己卯罷江南和糴

實錄稱江淮前月已罷矣

庚辰知揚州許遜請令兩浙路權罷和雇船所冀行商得載糧斛以濟活旱民從之遜歛縣人也

解池鹽自生凡數十里陳堯叟等所獻凡四千七百斤

辛巳分賜近臣及三館祕閣官 河東轉運使兵部郎
中陳若拙請以所部緡帛芻粟十萬轉輸河中以助經
費許之

癸未詔襄州賜盧多遜子察錢三十萬令葬其父母
陳堯叟言築壇於睢上如方丘之制廟北古雙栢旁起
堆阜即就用其地焉

丙戌契丹主遣臨海節度使蕭噶琳給事中室程奉其
母遺物來上又遣左威衛上將軍蕭善寧左領衛大將

軍張崇濟獻御衣文犀帶名馬弧矢等謝賻禮 對宰
相於龍圖閣觀奉迎天書圖 詔督諸州捕賊其希恩
故犯者雖遇赦繫獄奏裁 有司請祭前七日遣官祀
河中府境內伏羲神農黃帝禹湯文王漢文帝周公廟
及於睢下祭漢唐六帝從之

丁亥上作宗室座右銘并注賜寧王元偓而下從判宗
正等趙湘請也

己丑知華州崔端言父老四千二百餘人欲詣闕請幸

西嶽詔荅之

庚寅詔自今至雄州諸縣鎮令佐使臣供契丹國信驛
置無闕者許書厯為勞課替還日與優便官

陳堯叟至汾陰數奏雲物之祥辛卯羣臣詣閣拜表稱
賀

壬辰詔應水陸路運祀汾陰物軍士並賜緡錢

癸巳杖殺入內高品江守恩時守恩部軍士挽載石車
駐鄭州祖村寨因違制市青苗私役軍士六百人取民

田麥穗及不奉詔擅董丁夫非理笞捶亡逸者二百人
令役夫蔡文又市驢不獲杖之致死上怒甚詔監察御
史王迎按劾親戒諭遣之獄成抵法知州太常博士俞
獻卿封勅不下抗章論救坐削一任京西路轉運使提
點刑獄官本州通判以不察舉並入金贖罪仍令進奏
院移告天下上曰迎推劾此獄頗盡公方有足嘉者尋
授開封府推官賜緋守恩雖近侍上不貸以法論者以
為朝廷至治行罰不私中外莫不悚慶

俞獻卿歙州人
然本傳不載其

曾知鄭州當考王迎未見

初有司議祠宇之旁難行覲禮欲俟還

至河中朝會肆赦於是陳堯叟等言寶鼎行宮之前可以設壇如東封之制詔如堯叟等奏

甲午詔修鳳翔府太白山泗州龜山廟

丁酉詔諸州先禁箭幹自今非連幹無節者不禁

戊戌開封府工曹叅軍張君房上疏言唐土德五運相承國家當承唐室正統用金德王且朱梁雖受唐禪而後唐克復不可謂承正統晉稱金德而江南李昇時實

稱唐漢承晉稱水德止四年而滅周承漢為木德止九年而四方分據太祖以庚申歲受周禪開寶乙亥歲平江南及太宗即位定并汾自是一統是國家乘金德以受命其驗明矣并獻所著論四卷上曰言此者多矣且國初徇羣議為火德今豈當驟改耶君房開封人也

己亥江淮發運使李溥言今春運米凡六百七十九萬石諸路各留三年支用江南留百七十萬石外有上供五十萬石淮南留三百三十萬石外有上供五十七萬

石所留以備賑糴兩浙有米百五十萬石上供外有九十一萬石備淮南賑糴

甲辰內出手札示輔臣令頒下江淮南安撫使諭以綏撫之道凡十二條

冬十月丙午朔陳堯叟奏河決白浮圖村方修塞之為南風所激即歸故道宰臣等奉表稱賀令中書日會

於王旦廳至辰時罷

王珪會要此下即載中書政事稽滯今依實錄附八年四月甲子

河中府民巨沼詣陳堯叟言五世祖誠在德宗時夜夢

人謂曰中條山蒼陵谷有靈寶真文以金札之明當往
取竢天書赤篆出可用參會如其言入谷三四里夜覩
黃光下有塊石碎之得黃金一斤卷帛書取藏於家誠
手筆為識後二百餘年屢經大兵饑家獨無苦其帛長
三丈廣九寸通判曹谷驗之云篆文非常體詞類道經
庚戌堯叟附中使趙敦信入獻以沼為本府助教賜衣
服銀帶器帛

曹谷未見是年為
度判者別一人

陳堯叟又言解州父老

欲詣闕奉迎車駕詔堯叟諭止之

辛亥雄州言契丹涿州移牒言本國將征高麗遣右監門衛將軍耶律寧奉書來告上曰前遣孫奭告以東封契丹館奭於境上但有報書今其使來當遣使接伴示以方守前約如堅欲赴闕亦從其請也及寧至涿州李允則止之寧言奉國命以機事馳報不敢駐允則即遣使臣伴送赴闕

丁巳羣臣詣閤門表賀得靈寶真文

每歲誕聖節皇親近臣皆許奏道釋而賜之紫服所奏

既猥多或有濫僞者戊午詔自今須披度五年以上方得奏請仍具鄉里居止年齒行業以聞

庚申丁謂等上大中祥符封禪記五十卷製序藏秘閣賜謂等器帛

丁卯命右司諫直史館李廸為契丹主生辰使六宅使合州團練使白守素副之監察御史乞伏矩為正旦使供奉官閤門祗候翟繼思副之守素居邊歲久名聞敵中頗畏伏之上慮其不欲行密遣內侍詢於守素守素

頓首感咽乃以內園副使崔可道代之

可道鄆州人乞伏矩已見四月

翟繼思未

書里邑

戊辰命三司使丁謂赴汾陰路計度糧草尋有詔謂至陝西薄稔處所輸稅令州縣勿督以常限

知雄州李

允則言契丹由顯州東侵高麗期以十二月還中京蓋慮朝廷使至彼也又上契丹兵數且言凡調發先下令使自辦兵器馳馬糧糗故其抄掠所得不補所失又常索境內漢口有罪者配軍曰驍武人皆嗟怨不為用又

給假令歸頗擾鄉閭恣求財賄其人或是兩地供輸戶已移文涿州止絕之

癸酉徙濟州團練使知濮州蔣信為滑州駐泊部署信好利縱下非牧民之才故也

乙亥禮儀使王欽若言準儀注祀后土地祇禮畢太尉封玉冊於廟庭石匱百官班于庭中皇帝謁廟禮畢至石匱南北向省視翰林天文邢中和等請置於前殿西間近北士地或不欲神側興土即改後殿士地竊詳儀

注本言封匱廟庭蓋以密邇神明昭明典禮若或置之
壬地奉於別殿縱於事為便亦在禮非宜且奠獻既周
仍服袞冕徧歷廊廡以屆後庭往復迂遠舊儀未有再
詳畫到廟圖未至迫窄欲望止於正殿欄楯之下奉安
石匱庶令百辟共覩靈壇詔付陳堯叟等詳定即請就
正殿下安匱仍設檻護淨奏可欽若又請車駕所經路
坊市三日禁止喪事從之

是月皇城司奏察訪御龍直班院副指揮使臣遇日暮

醉歸馬逸不能制百姓石譙為馬踐傷人言常時本班將士無故不出今不能禁上曰可下開封府按問因謂王旦等曰禁軍將士無故不令出班故每班置市買二人太祖朝法令嚴肅無敢犯者太宗時稍從寬貸亦安敢醉酒馳馬旦等言此皆驍勇之士正當因事誠約上然之

十一月丙子朔命東西京留守司河陽天雄澶徐等州長吏提舉鄰近諸州巡檢捉賊事諸路部署及河北河

東河西等處知州亦如之以大禮有期故也

庚辰徙司天臺韓顯符所造銅渾儀於龍圖閣召輔臣同觀因詔顯符擇監官或子孫可教者授其法

庚寅召宰相至龍圖閣謁宣祖太祖聖容遣內臣奉安於安陵永昌陵下宮

壬辰召資政殿大學士向敏中龍圖閣學士杜鎬直學士陳彭年待制張知白孫奭查道洎編修君臣事迹官監察御史陳從易大理寺丞祕閣校理劉筠對於崇政

殿命坐上顧敏中等曰從易輩屢進文字皆有可觀因命筆硯令即席賦瑞雪歌祀汾陰詩上命題彭年筆授既進上覽之曰筠辭采頗贍並賜緋魚又謂敏中曰今學者易得書籍敏中曰國初惟張昭家有三史太祖克定四方太宗崇尚儒學繼以陛下稽古好文今三史三國志晉書皆鏤板士大夫不勞力而家有舊典此實千齡之盛也詔將來出西京經麗景金耀平頭門改乘小輦其金玉輅大輦並由城外初有司言至京西具鑾

駕儀仗皇帝乘大輦而城門卑庳不能容望高廣之上
慮勞人故有是詔 李允則言頃年契丹加兵女真女
真衆才萬人所居有仄城以水沃之凝為堅冰不可上
距城三百里焚其積聚設伏於山林間以待之契丹既
不能攻城野無所取遂引騎去大為山林之兵掩襲殺
戮今契丹趨遼陽伐高麗且涉女真之境女真雖小契
丹必不能勝也仍畫圖以獻又言契丹以西樓為上京
遼陽為東京在中京正東稍南其習俗既葬畢守墳或

云國主欲守其母墳聲言伐高麗駐遼陽城也上謂王
旦等曰契丹伐高麗萬一高麗窮蹙或歸于我或來乞
師何以處之旦曰當顧其大者契丹方固盟好高麗貢
奉累數歲不一至上曰然可諭登州侍其旭如高麗有
使來乞師即語以累年貢奉不入不敢達于朝廷如有
歸投者第存撫之不須以聞初高麗王誦卒其弟詢權
領國事嘗築六城於境上曰興化曰鐵州曰通州曰龍
州曰龜州曰郭州契丹以為貳於已遣使求六城詢不

許契丹遂舉兵奄至城下焚蕩宮室剽劫居人詢徙居
昇羅州以避之兵退乃遣使請和契丹堅以六城為辭
詢即調兵守六城及是契丹又大舉來伐詢與女真合
兵拒之契丹大敗帳族卒乘罕有還者官屬戰沒大半
乃令幽薊選嘗干仕進及稍知書者以補其乏歸取介
冑萬副隆慶以疑間不給拔寨遁歸高麗又於鴨綠江
東築城與來遠城相望跨江為橋潛兵以固六城

據會要高

麗王詢大中祥符七年十二月所上表稱庶戌年蕃兵
奄至城下詢徙居昇羅州調兵守六城又云大中祥符

三年契丹大舉來伐按大中祥符三年即庚戌年也不知詢表何以如此差誤今從國史高麗傳或契丹是歲兩伐高麗初勝後敗邪當考

乙未甘州輝和爾罕伊魯格勒遣左溫宰相赫矩魯越樞密使渠富綬榮來貢

戊戌上作詩賜京西轉運副使王隨父母隨因對自陳父年八十餘母七十餘居河南今在廵內上嘉其耆耄善訓故旌美焉又賜粟帛羊酒令隨過家為壽時人榮之

庚子陝州言寶鼎縣黃河清遣官致祭羣臣稱賀

壬寅契丹遣使左武衛上將軍耶律登政副使祕書少監馬翼來賀承天節

十二月乙巳朔陳堯叟自汾陰來朝宴于長春殿故事
內殿曲宴三司使不預時丁謂計度糧草還特召預焉
雄州言契丹敗衄之狀上曰戰危事蓋不得已非可
好也

丙午寶鼎縣黃河再清經度制置副使李宗諤以聞上

作詩近臣畢賀

庚戌召輔臣於長春殿觀新製天書行殿供物

士子大宴含光殿軍校營在新城外者並令終宴至夕
遣內侍持鑰往諸門候盡出闔扉入鑰遂為定制

癸丑詔天下貧民及漁採者過津渡勿算

舊制皇帝謁廟入自正門至庭百官皆回班東向上以
為方尊事祖宗當自貶屈甲寅詔自今謁廟由東偏門
入至庭不得令百官回班

乙卯告太廟奉天書如東封之制

丙辰以資政殿大學士向敏中權東京留守三司使丁謂為行在三司使鹽鐵副使林特副之

丁巳翰林學士李宗諤等上新修諸道圖經千五百六十六卷詔獎之宗諤而下賜器帛有差

庚申命步軍都虞候袁貴赴河中府鈐轄駕前先至兵馬其至陝州者令部署田敏主之

辛酉謁玉清昭應宮

先是有使至自沙門島言流人多殍死請量給口糧馬
知節曰流人無廩食之理丙寅詔特給焉 知秦州李

濬言黑谷頗有閒田今召得寨戶三百餘戶三丁計
九百餘人駐小洛門諸寨防邊 初胡旦編兩漢事為

春秋言於太宗願給借館吏繕寫太宗語侍臣曰呂不
韋春秋皆門下名賢所作尚懸千金咸陽市曰有能增
損一字者與之如聞旦所撰止用其家書褒貶出於實

臆豈得容易流傳耶竢其功畢且令史館叅校以聞旦

懼遂止於是旦通判襄州書成凡百卷知州謝泌又為言乃詔官給筆劄錄本以進天聖二年始上之

丁卯簽署樞密院事馬知節為行宮都部署昭宣使長州防禦使劉承珪管勾皇城大內公事

上以汾陰展禮有期詔大官進蔬食宰相百官三上表請御常膳上曰太祖太宗每奉郊禋皆屏葷茹朕三祀園丘並遵行之顧外庭不知耳東封亦自戒途蔬食無勞固請也已已作奉天庇民述以諭王旦等旦以羣情

懇懇許至西京始却肉味 禁扈從諸色人燔爇道路
草木 詔天書儀衛副使王欽若趙安仁扶侍使丁謂
龍圖閣直學士陳彭年與太常禮院詳定奉事天書儀
制以聞既而欽若等著為五卷上之

庚午契丹遣使保安節度使耶律德壽副使崇祿少卿
呂德懋來賀明年正旦

辛未以太宗御書百軸賜交州李公蘊從其請也

癸酉命向敏中為權修玉清昭應宮使 河南緣邊安

撫司言契丹於朔州南丹置榷場詔以舊降條約諭之
知雜御史趙湘請依周禮置土訓誦訓纂錄所經山
川古跡風俗以資宸覽詔直集賢院錢易直史館陳越
祕閣校理劉筠集賢校理宋綬掌其事每頓進一卷

龍圖閣特制孫奭由經術進守道自處即有所言未常
阿附取悅上嘗問以天書奭對曰臣愚所聞天何言哉

豈有書也上知奭樸忠每優容之

奭正傳云奭以經術進守道自處即有所

言未嘗阿附取悅大中祥符初得帛書祕語於左承天
門或以為天書上將奉迎召宰相對崇政殿西廡王旦

等曰天貺符命實盛德之應皆再拜稱萬歲又召問與
與封曰臣愚所聞天何言哉豈有書也上既奉迎天書
大赦改元布告其事於天下築玉清昭應宮是歲天書
復降泰山帝以親受符命遂議封禪作禮樂王欽若陳
堯叟丁謂杜鎬陳彭年皆以經義左右附和由是天
下爭言符瑞矣正傳既云築昭應宮又云是歲天書復降
泰山帝以親受符命遂議封禪按初得左承天門天書
即議封禪不緣天書復降泰山乃議封禪也正傳誤矣
正傳大抵尚文文勝則事固失實今但是歲特命向敏
取天何言哉安有書也等語餘悉刪去

中諭與令陳朝廷得失與上納諫恕直輕徭薄歛四
事頗施用其言及將有汾陰之役會歲旱京師近郡
穀價翔貴與遂奏疏曰

與附傳云大中祥符三年令
宰相向敏中諭與按敏中時

但為資政殿大學士未嘗再入中書也今削去宰相字

先王卜征五年歲習其

祥祥習則行不習則增修德而改卜陛下纔畢東封更議西幸則非先王卜征五年重謹之意其不可一也夫汾陰后土事不經見昔漢武帝將行封禪大禮欲優游其事故先封中嶽祀汾陰始巡幸郡縣寢尋于泰山矣今陛下既先登封復欲行此其不可二也周禮圜丘方澤所以郊祀天地今南北郊是也漢初承秦唯立五時以祀天而后土無祀故武帝立祀於汾陰自元成

已來從公卿之議徙汾陰后土于北郊後之王者多不
祀汾陰今陛下乃欲舍北郊而祀汾陰其不可三也西
漢都雍去汾陰至近今陛下經重關越險阻京師根本
未易遠離其不可四也河東者唐王業所起之地唐又
都雍故明皇間幸河東因祀后土與聖朝事異今陛下
特舉欲祠汾陰其不可五也夫遇災而懼周宣所以中
興比年已來水旱相繼陛下宜側身修德以荅天譴豈
宜下徇姦回遠勞民庶忘社稷之大計慕簫鼓之盤遊

其不可六也夫雷以二月出八月入育養萬物人君之
象失時則為異今震雷在冬為異尤甚天戒丁寧陛下
未悟此其不可七也夫民神之主也是以先王先成民
而後致力于神奉牲以告曰博碩肥腍謂民力之普存
也奉盛以告曰潔粢豐盛謂其三時不害而民和年豐
也今國家土木之功累年未息水旱作沴饑饉居多乃
欲勞民事神神其享之乎此其不可八也陛下必行此
禮不過如漢武帝唐明皇刻石頌功而已此皆虛名也

陛下天縱欽明神資濬哲固當追蹤二帝三王之事豈止效此虛名乎此其不可九也唐明皇嬖寵害政姦佞當塗以至身播國屯兵纏魏闕今議者引開元故事以為盛烈乃欲倡導陛下而為之臣竊為陛下不取此其不可十也臣猶懼言不逮意願少賜清閒以畢其說上遣內侍皇甫繼明諭以若復有陳其具條上之於是真又上疏曰陛下將幸汾陰而京師民心弗寧江淮之衆困于調發理須鎮安而矜存之且土木之功未息而奪

攘之盜必行北朝治兵不遠邊境雖馳單使寧保其心
昔黃巢出自凶饑陳勝起于徭戍隋煬帝緣勤遠略唐
高祖由是開基晉少主智昧邊防耶律光因之謀夏今
陛下俯從姦佞遠棄京師罔念民疲不虞邊患涉仍歲
薦饑之地修違經久廢之祠又安知饑民中無黃巢之
劇賊乎役徒內無陳勝之陰謀乎肘腋之下無英雄之
窺伺乎區脫之間無天驕之觀釁乎陛下方祠后土駐
蹕河中若敵騎猖狂忽及澶淵陛下知魏咸信能堅據

河橋乎周瑩居中山能摧鋒却敵乎又或渠魁使帥嘯聚原野劫掠州縣侵軼郊畿行在遠聞得不驚駭陛下雖前席問計羣臣欲借筋出奇以臣料之恐無及也又竊見今之姦臣以先帝寅畏天災詔停封禪故贊陛下力行東封以為繼成先志也先帝欲北平幽朔西取繼遷大勲未集用付陛下則未嘗獻一謀畫一策以佐陛下繼先帝之志而乃卑辭重幣求和于契丹感國縻爵姑息于保吉謂主弱臣死為空言以誣下罔上為已任

撰造祥瑞假託鬼神纔畢東封便議西幸輕勞聖駕虐
害饑民冀其無事往還謂已大成勲績是陛下以祖宗
艱難之業為佞邪僥倖之資臣所以長嘆痛哭也夫天
神地祇聰明正直作善降之百祥作不善降之百殃安
在其遵豆簋簋乎春秋傳曰國之將興聽于民將亡聽
于神固非愚臣妄議也時羣臣數奏祥瑞輿又上疏言
五載巡狩虞書常典觀民設教犧易明文何須紫氣黃
雲始能封嶽嘉禾異草然後省方今乃野鵬山鹿並形

奏簡秋旱冬雷率皆稱賀將以欺上天則上天不可欺
將以愚下民則下民不可愚將以惑後世則後世必不
信腹誹竊笑有識盡然上玷聖明不為細也疏入不報
後疏未必即是今年按今年九月丙戌內侍史崇貴言
經度制置使初至雕上一鹿自廟中出如引導之狀即
與疏所稱山鹿也疏又稱秋旱冬雷按是秋江淮不稔
當以旱故前疏稱震雷在冬此時上猶未幸汾陰則冬
雷必指今年故并
附此更須考詳

欽定四庫全書

續資治通鑑長編卷七十五

宋 李燾 撰

真宗

大中祥符四年春正月丙子知茂州郭用之言夷族首
領耆老董瓢等頃多侵擾今相率於州北三溪刑牛犬
誓不為寇

舊制縣吏能招增戶口者縣即升等仍加其奉緡至有

析客戶為主雖登于籍而賦稅無所增入戊寅下詔禁之

己卯命開封府推官太常丞李階齋書諭契丹以特祀

汾陰令至境上付其疆吏

李階未見

庚辰詔北緣邊州軍官屬自今不得以迎送為名出城

寨馳獵犯者以違制論 賜諸王府侍講國子博士張

頴器幣頴講尚書終篇故也

陝西提點刑獄司言邠寧環慶副都部署陳興縱所部

禁兵為劫盜又釋不誅辛巳徙知永興軍王嗣宗代之
邠州城東有靈應公廟傍有山穴羣狐處焉妖巫挾之
為人禍福風俗尤信向水旱疾疫悉禱之民語為之諱
狐及嗣宗至燠而逐之盡塞其穴淫祀遂息 詔應汾
陰行事官及職掌人敢有懈惰者勿以赦原

豐州北藏撥勒西族中族首領弩伊亨全等並遣子來貢
癸未代州言粟斗十餘錢

甲申趙德明奉表訴言明愛等侵耕其綏州界乞遣使

按視詔張崇貴詳度令明愛等還內地

乙酉親習祀后土儀於崇德殿初有司詳定止習壇上
儀上崇重大祀乃并廟庭及封石匱儀徧習焉 命樞
密直學士周起閣門祇候郭盛入內殿頭閭文慶編次
貢奉 給事中种放自終南山來朝

丁亥謁啓聖院太宗神御殿普安院元德太后聖容告
將行也 定州科鹿角數多詔河北轉運使裁減之

己丑詔大祀酌酒銀鍮器止用常御者非朕恭潔之意

其令有司造十五枚付光祿寺別貯仍刻字識之勿他用

庚寅詔江湖間貧民捕魚豪戶不得封占從知洪州王濟之請也

壬辰詔河南府孟鄭州所發浚汴口役夫今年夏稅止令本處輸納

甲午客省使誠州刺史李允正為鄜延路部署時趙德明頗踰軼初允正被病授河陽部署以便顧養不半月

亟徙焉仍令內侍密詔存諭允正未至即命計度汾陰

行宮道路曹利用權廊延路部署

允正本傳云張崇貴卒亟徙允正按崇貴

是年八月乃卒此時未也若病則不可知今且削去更徐考之

文思使靳懷德領長

州刺史為益州鈐轄懷德歷官以彊幹稱然酗酒多失將行別詔戒勗又面誨之懷德在劍外果善於其職軍

民畏愛

上以靈文疊降盡志欽奉且欲垂訓子孫俾奉事無怠

仍為誓文乙未命刻石置玉清昭應宮寶符閣下

按木志大

中祥符元年四月天書又降大內功德閣而實錄本紀並不書實錄於此載上語云靈文三錫蓋兼指功德閣也而本志又改三錫為疊降今從本志實錄於天禧元年正月壬戌因詔書建節名乃著其事不知前此不以宣示何也

丁酉車駕奉天書發京師日上有黃氣如匹素五色雲如蓋紫氣翊仗是夕次中牟縣

戊戌次鄭州命龍圖閣學士陳彭年待制王曙同詳定
邀駕詞狀

己亥次滎陽縣

庚子次鞏縣右僕射判河陽張齊賢見于汜水頓侍食
畢即遣還任

辛丑過訾村設幄殿奉置三陵神座上韓袍拜哭奠獻
是日晴霽始就次蒼煙白霧起陵上俄覆神幄禮畢乃
散咸以為上哀慘所感夕次偃師縣 詔同州民於沙
苑採薪蒸者勿禁

壬寅車駕至西京

甲辰發西京至慈澗頓太官始進素膳民有耕道旁者

召問慰撫賜以茶薜夕次新安縣

二月乙巳朔次澠池縣杖太僕寺府史霍鼎先是儀仗中悉以軍士給役而鼎擅集貧民挽輓上知之令禮儀使劾罪科責其判寺官及編排儀仗忠佐特赦不問

禁諸色人以進奉為名私染御服繒帛及製乘輿服用之物飾以龍鳳從編排進奉周起之請也 命知河南府薛映造輦水小車十乘付行在三司時山路泉深負汲者勞上憫焉俾運載以代其役 詔行在部署司凡

亡命卒及貧民小竊者不須收捕再犯者准法

丙午次碭石縣

丁未入陝州是日雨上謂殿前都指揮使曹瑛曰諸軍
衣裝行止之間泥潦濡汚曾不愛惜此皆出民力可申
戒之

戊申賜扈駕諸軍緡錢 詔獎權東京留守向敏中等
以獄空故也

己酉次靈寶縣 詔緣路病馬悉赴同州沙苑監養療

令羣牧司立殿最之法以賞罰之

庚戌次湖城縣

辛亥次閼鄉縣

壬子出潼關渡渭河次嚴信倉遣近臣祀西嶽

癸丑次河中府

甲寅工部侍郎馮起為考制度使刑部員外郎兼侍御史知雜事趙湘副之

丙辰次永安鎮遣近臣祀河瀆

丁巳發永安鎮有黃雲隨天書輦法駕入寶鼎縣奉祇
宮遣中使督開浚汴口仍犒設官屬

戊午致齋召近臣登延慶亭南望僊掌北瞰龍門自宮
至睢上列植嘉樹六師環宿行闕旌旗帝幕照耀郊次
眺覽久之趙德明遣使來貢

己未寶鼎縣漢泉湧有光如燭

庚申羣官宿祀所

辛酉具法駕詣睢壇夾路燎火其光如晝甬道盤屈周

以黃麾仗初路由廟南上以未修謁不欲乘輿輦過其
前令鑿路由廟後至是從新路至壇次服袞冕登壇祀
后土地祇備三獻奉天書於神座之左以太祖太宗並
配悉如封禪之禮先是睢上多風及行禮頓止司天言
黃氣統壇月重輪衆星不見惟大角光明少頃改服通
天冠絳紗袍乘輦詣廟登歌奠獻省封石匱遣官分奠
諸神登鄧丘亭視汾河望梁山顧左右曰此漢武帝泛
樓船處也一時之樂垂於千古即日還奉祇宮鼓吹振

作紫氣四塞觀者溢路民有扶老攜幼不遠千里而至者或感泣言曰五代以來此地為戰場今乃獲覩天子巡祭寶千載一遇之幸也詔以奉祇宮為大寧宮增葺殿室設后土聖母像又遣官祭告河瀆 甘州輝和爾蒲端三麻蘭勿巡蒲婆羅大食國吐蕃諸族並遣使來貢蒲端又獻崑崙奴一上閔其異俗離去鄉土命還之壬戌御朝觀壇受羣臣朝賀大赦天下恩賜如東封例河中府特給復一年半建寶鼎縣為慶成軍給復二年

距雕上三里禁樵採文武官該叙封欲回授祖父母者
聽四品以上官逮事太祖太宗初潛或嘗更遷任家無
食祿者錄其子孫建隆佐命王公將相邱冢令所在致
祭給西京分司官實奉三分之一諸處罪犯人并部送
闕下者皆刺滿面大字毀形頗甚尤可憫傷自今不得
更然律令編勅內條目失於重者宜令法官詳定聞奏
務從輕典賜天下酺三日大宴穆清殿賜父老酒食衣
幣上作汾陰二聖配饗銘河瀆西海等贊

湘山野錄真
宗回蹕次河

中長安父老三千人詣行在表乞臨幸種放以三不便諫乃止按國史實錄畧無此事野錄又言放時有兄喪及乞還山林等皆謬誤與正史實錄不合今不取

癸亥發慶成軍觀漢泉夕次永安鎮 詔緣邊州軍有契丹界饑民逐糧而至者速遣還無得留止 命龍圖閣待制查道先還東京備鹵簿儀仗

甲子次河中府賜扈駕諸軍緡錢幸舜廟賜舜井名廣孝泉親作贊渡河橋觀鐵牛又幸河瀆廟廟西有西海望祭壇上顧其壇制非廣令有司討尋典故增築登後

亭見民有操舟而漁秉耒而耕者上曰百姓作業其樂
乎使吏無侵擾則日用而不知矣遂幸開元寺紫極宮
逍遙樓賦詩賜從臣召草澤李瀆劉巽瀆以疾辭授巽
大理評事致仕瀆瑩子淳澹好古王旦李宗諤與之世
舊每勸其仕瀆皆不荅於是直史館孫冕言其隱操陳
堯叟復薦之既辭疾不至遣內侍勞問令長吏歲時存
撫賜西京河中府陝鄭二州緡錢為宴犒肴酒之費
也

乙丑御詔駐蹕宣恩樓觀酺 加號西嶽金天王曰順
聖金天王遣鴻臚少卿裴莊祭告又詔葺伯夷叔齊廟
丙寅賜親王輔臣百官酺宴于行在尚書省凡二日上
作汾陰禮成詩就宴所賜之

丁卯賜河中尹寧王元偓衣帶鞍馬錢百萬銀千兩并
經度制置使副所過州府長吏器幣有差

戊辰發河中府以寒食申嚴火禁過新市鎮渡洛水橋
次嚴信倉

己巳次華陰縣幸雲臺觀觀希夷先生陳搏畫像除其
觀田租

庚午謁順聖金天王廟羣臣陪位廟垣内外列黃麾仗
遣官分奠廟內諸神又幸巨靈真君觀並除其田租宴
從官父老於行宮之宣澤亭紫雲如龍起嶽上上作西
嶽贊僊掌詩召見華山隱士鄭隱敷水隱士李寧賜隱
號曰貞晦先生隱自言始以經術為業遇道士傳辟穀
鍊氣之法修習頗驗遂居華山之王力巖

按華嶽志無
王力巖據雍

勝畧王刁三洞在華山東寶谷中僊人二十餘年冬夏王遙刁自然登僊處有上中下三洞云

常衣皮裘寧精於藥術老而不衰每以藥施人人與金帛多拒之並賜御詩并茶藥束帛隱辭所資不受

辛未次閬鄉縣召承天觀道士柴通元賜坐問以無為之要賜詩茶藥束帛除其觀田租通元年百歲善服氣語無文飾多以修身謹行為說云

壬申次湖城縣宴號州父老于行宮門

癸酉次靈寶縣

三月甲戌朔次陝州召草澤魏野辭疾不至野居州之東郊不求聞達趙昌言寇準來守是州皆賓禮焉為詩精苦有唐人風契丹使者嘗言本國得其草堂集半帙願求全部詔與之野既辭召命即遣使圖上其所居令長吏常加存撫

乙亥幸順正王廟作鐵牛詩宴從官父老于霈澤惠民樓又登北樓望大河觀山川形勝賜運船卒時服作詩題棟間是日雨石普請駐蹕城中勿涉泥濘上作詩賜

普因令扈從至京

丙子次硤石縣

丁丑次澠池縣 陝西言芮城縣民樊景溫異居四十餘年其家樗樹分生五枝復合為一景溫等感之復同居

戊寅次新安縣上之還也以道遠閔衛士肩輿執蓋之勞多乘馬御烏藤帽

己卯車駕入西京賜迎駕僧道絹五百匹 令京兆府

禁民樵採種放莊園 先是許人入錢京師就陝西請
給轉運使李士龍言管內所收課利匪多支贍亦廣望
權罷三年許之

庚辰上謂輔臣曰洛陽宮闕壯麗然城北地隘穀洛淺
滯輦運艱阻諒非久居之所第因行禮暫巡幸耳時途
中屢有甘澍之應皆夕降晨止從官衛士無霑服之患
又農務方興耕民瞻望輿駕歡抃相屬上作喜雨述懷
歌羣臣畢和又以知河南府薛映有治狀賜詩嘉獎

此據

本傳 詔罷河北緣邊工役非急者

癸未張齊賢自河陽來朝召之也

甲申幸應天禪院賜監修太祖神御殿官及工匠將士衣服緡錢又幸太子太師呂蒙正第慰撫之賜珍藥御酒衣帶鞍馬金幣問蒙正諸子孰可用對曰臣之子豚

犬耳猶子夷簡宰相才也

邵氏見聞錄載蒙正言有姪夷簡任棣州推官按夷簡於

大中祥符元年以大理寺丞舉賢良此時不應尚為幕職也今削去

陳堯叟李宗諤自

河中府來朝言初經度祀事至禮畢凡土木工三百九

十萬餘止役軍士輦送糧草供應頓遞亦未嘗差擾邊民上稱善

丁亥召宰臣徧閱諸殿出御製再幸西京記示之所經歷代帝王祠廟並令增葺

戊子丁謂言有鶴二百餘翔天書殿上又有百餘飛集太清樓知并州劉綜獻豐年圖

先是巡幸所至改賜門名己丑御五鳳樓觀醵有司請如例上曰此太祖所建以表瑞應不可更也車駕將

朝陵詔自西京至鞏縣不舉樂文武官有先塋在近者
並給假拜祭戒扈從人踐田稼 雄州言入契丹副使
崔可道病卒契丹自幽州具鼓吹衛送其柩以歸詔遣
中使護其喪事 內侍楊守珍捕賊京東移文應天府
造木驢丁架府以聞上以非法乃詔遣使出外無得造
慘虐殺賊之具 守珍於八年九月又見
甲午發西京次偃師縣輿輦織蓋鳴鞘警場奏嚴金吾
喝探悉罷之

乙未上素服乘馬至永安縣齋于行宮

丙申謁安陵永昌永熙元德皇太后陵上奠獻悲泣感動左右初至永昌陵遇雨有司請徙板位遙奠於門廡間上不許親涉泥塗而進未明禮畢復詣四陵奉辭省視几筵奠酌如初禮又徧詣諸后陵諸王墳致奠命中使徧祭皇親諸墳及詣汝州祭秦王墳 西涼府吐蕃多斯結等來貢

丁酉次鞏縣右僕射張齊賢辭歸河陽賜衣帶器幣如

侍祠例

戊戌至汜水縣虎牢關路隘險命執炬火以警行者河陽結綵為樓備樂將奏上以太宗忌辰甫近亟止之賜物如例上每自下旬即不舉樂故也 次滎陽縣改虎牢關為行慶關

己亥次鄭州詔三陵所管兵士有罪者止得科罰其當杖者送永安縣 禮儀使王欽若請躬謁太廟畢親詣元德皇太后廟詔禮官定議議如欽若所請從之

庚子召從官宴於回鑾慶賜樓宴父老於樓下不作樂
壬寅發鄭州過潘孝子墓命有司表之次中牟縣

癸卯次瓊林苑賜諸部署鈐轄羊酒犒設將士

夏四月甲辰朔車駕至自汾陰

乙巳賜扈從諸班直諸軍及所經戍兵舖卒諸司官健
緡錢有差道病死者悉給其家

丁未令江淮轉運司僱客船轉粟以賑登萊州饑民
己酉謁太廟又謁元德太后廟自門降輦步入酌獻如

太廟設登歌兩省御史供奉官宗室防禦使以上並班
於廟內餘於廟外參知政事馮拯趙安仁分告孝惠諸
后廟

庚戌詔以時漸炎燠京師賜酺宜至今秋放西京皇城
內外園苑灑掃役夫六十餘人歸農量增軍士給役

辛亥謁啓聖院太宗神御殿普安院元德皇太后聖容
壬子左龍武將軍澄州刺史駙馬都尉李遵勗私長公
主之乳母謫均州團練副使始遵勗請對言其事欲歸

過他人會赦弗問及事露上遣使詰之辭多矯誣上怒然以長公主未嘗言遵勗之失恐傷其意不忍深究也既而輔臣列奏請正朝典乃有是責遵勗尋以疾求徙

居蔡州許之

司馬光日記云劉攽言李遵勗坐無禮於長公主之乳母貶均州團練副使真宗欲

殺之先召長公主觀其意語之曰我有一事欲語汝而未敢公主驚曰遵勗無恙乎因流涕被面僵仆於地乃不果殺及李淑受詔撰長公主碑宣言赦李遵勗事尤美不可不書諸子聞之懼重賂淑不果書按真宗性仁必不至遽欲殺遵勗恐

峽路鈐轄慕容德琛部送為

惡蠻人王羣體等至闕下上曰蠻人不識教義向之為

亂亦守臣失於綏撫耳並免死配隸江浙遠地

德琛延釗子也

趙德明遣使貢馬賀汾陰禮畢賜德明衣帶鞍馬器幣賓佐將士銀帛茶菡時貢馬子弟或與民相毆有折齒者開封府言當杖脊詔以事付鄜延路令移文德明就彼決遣之

癸丑詔迎導天書玉輅將士例外別賜緡錢遣近臣祭謝后土西嶽西海四瀆又遣官分詣諸陵廟致祭秦州輝和安密等貢玉帶賀汾陰禮畢

甲寅給事中种放還終南山賜宴賦詩如前例

已未詔恭上汾陰后土廟額曰太寧遣中使增葺廟宇
令知河中府周起一月一檢校民庶祭賽止拜廷中官
吏非祠祭亦勿升殿 以河中府進士薛南為試將作
監主簿首詣闕請祀汾陰者也 錄王繼勲子惟德為

汝州軍事推官惟德子用和先隸軍特令落籍歸侍繼
勲坐多殺不辜被誅其家窮窘上以孝明皇后故特卹
其嗣 同州饑民有鬻子者遣官馳驛存撫賑濟 詔

兩京諸路本城諸司庫務軍校補職及二十年者特與轉資

庚申詔唐相婁師德廟宜禁樵採

先是京東轉運使副使馬元方按部至濮州知州蔣信張宴元方倨慢既醉即毆信會赦免劾辛酉徙元方知宿州仍下詔切責之

甲子楚王元佐為太尉寧王元偓為成德安國節度使

進封相王

按原本作襄王誤考真宗本紀及此書八月壬寅增給諸王府公用錢相王舒王歲萬三

千貫則當從本紀作相為是

舒王元偁為鎮南寧國節度使元佐而

下並兼中書令榮王元儼為安靜武勝節度使兼侍中

定難節度使趙德明守中書令

乙丑葺尚書省三月而畢

八月乙巳畢功

丙寅羣臣用壬戌赦書咸以次遷秩客省使忠州刺史

曹利用為內客省使領嘉州防禦使日就食於樞密院

先是以內客省使廳事為三班院於是令三班院分廳

事處之

近時蔡廷慶之孫名興宗者著祖宗官制舊典云太祖以內客省使換樞密以延福宮使換宣

徽按本志內客省使乃唐置其就食於樞密亦舊例也
不知興宗所記換樞密事出何書當考蔡氏又云內客
省使累朝不置崇寧後只除童貫一員而已恩數幾同
執政以元自樞密使副換此名也按太祖朝吳廷祚李
處耘王仁瞻李崇矩曹彬並先後居樞密使副
之任獨不見由使副換內客省者為何人當考

已巳令并州葺晉祠衡州葺神農廟 上謂宰相曰朕

閱唐六典起居郎舍人司諫正言凡十二員近者此官
多闕可因覃慶選有才望為中外所知者補之於是直
史館陳堯佐樂黃目盛元王隨路振崔遵度陳知微李
詔陳越等九人悉授兩省官盛元餘杭人後改名度

壬申詔諸州勿遣司理叅軍監蒞場務

是月贈中書令許國文穆公呂蒙正卒

五月甲戌朔詔自今宰相官至僕射者並於中書都堂
赴上不帶平章事者亦於本省赴上令太常禮院檢討
詳定儀注先是中書侍郎兼兵部尚書平章事王旦遷
右僕射止於本廳受賀上寵待輔臣遂命振舉舊儀

丙子加交趾郡王李公蘊同平章事 洪州言知州刑

部郎中王濟卒濟臨終自草遺表以進賢俊退諛佞及

罷土木不急之費為言餘不及私

己卯閣門言自今內職將校請依文武官例假日不許辭見從之

乙酉增皇姪以下月俸先是初授官俸三十千稍加五十千再加七十千行慶之後各求領郡上以新進秩不許但增俸焉

丁亥蒲端國主又遣使來貢方物以金板鐫所上表辭己丑遣使籍緣汴裝卸卒分隸諸州下軍以其間多彊

暴之輩騷擾平民也

庚寅幸上清宮景德開寶寺遂謁玉清昭應宮 京兆

府旱詔賑之 詔諭諸道設科取士之意俾各盡至公
或致遺材當行覆視其應解而不解不應解而解者並
行朝典

癸巳以內客省使曹利用為鄜延部署代李允正也徙
允正知永興軍允正性嚴毅喜行殺戮素病痼痿故罕
在要近云 王承美請於豐州城內置元聖文宣王廟

從之

乙未詔加上東嶽曰天齊仁聖帝南嶽曰司天昭聖帝
西嶽曰金天順聖帝北嶽曰安天玄聖帝中嶽曰中天
崇聖帝命翰林學士李宗諤龍圖閣直學士陳彭年與
禮官詳定儀注又作奉神述備紀崇事之意

王偁東都
事畧詔曰

峻極之嶽神靈主焉
其加上五嶽帝號

丁酉御崇政殿慮囚死罪以下遞降一等

己亥以主客郎中李巽為度支郎中兩浙轉運副使司

勲員外郎王矩為工部郎中京西轉運副使初遣官提點刑獄至是代還命資政殿大學士向敏中等較其殿最以嘗活冤獄者為第二等皆遷秩朝臣為轉運使使臣知州餘為第三等授近地知州監軍異矩皆入第二等故也


李異已見景德二年四月當考

改西京永安指揮曰奉先升

為禁軍在清塞之下

壬寅詔淮南諸州民今年夏稅租願納錢者竝聽從便詔郎中及帶職員外郎已上遇汾陰赦乞保任其子

竝依例施行



欽定四庫全書

史部

續資治通鑑長編卷七十九至

詳校官檢討_臣劉錫五

刑部郎中_臣許兆椿覆勘

纂修官編修_臣任衛史_臣陳昌圖

謄錄貢生_臣苗序濂

欽定四庫全書

續資治通鑑長編卷七十六

宋 李燾 撰

真宗

大中祥符四年六月癸卯朔徐州言知州山南東道節度使駙馬都尉吳元扆卒上甚悼惜之贈中書令謚忠惠子弟進秩者五人且以得疾時本州不即上言有詔劾其官屬後堊元扆時上尤然燈為移次夕

已酉詔諸路州府遣親屬奉方物詣汾陰者送學士院量試本業授試秩齋郎不就試者補三班借職如東封例

辛亥益州言知霸州董仁誥為其巡檢使董延早所殺庚申命龍圖閣直學士陳彭年待制張知白王曙同詳定閣門儀制

甲子以甚暑錄示軍民解毒方 開封府言祥符縣有飛蝗 先是春秋二仲月遣宗正卿以公服巡陵於是

詔以祭服行事 上以歙州歲供宣敕大紙其數甚多
頗勞民力思有以寬之知樞密事王欽若因奏諸房紙
羨餘者凡一十萬八千三百番望令三司罷給一年仍
裁本州造數從之 遣使宣諭副都承旨張質已下仍
特賜御筵

江淮南水災民饑丙寅命起居舍人直史館李迪為安
撫使內殿崇班閤門祗候張利用為都監所至存問里
閭察訪官吏訊詳犴獄寬節財征以便宜從事既而迪

等言廬壽州早稻已登江洪筠袁州漲溢民田不至全

傷

張利用未見

知洪州李元病上與宰相歷選朝士將徙

知揚州凌策代之上曰南昌水潦艱虞長吏當便宜從

事不必稟於外計也王旦言策涖事和平若委以方面

望即授江南轉運使詔可仍遣使諭以遴簡之意饒州

產金前詔禁商賈販鬻或有論告逮繫滿獄策請縱民

販市官責其算人甚便之

實錄於明年閏十月末乃書饒州事今依本傳并書之策

除漕乙丑日也

授交甘等州大食蒲端三麻蘭勿廵蒲婆羅

國進奉使官 劔利閭集壁巴等州饑詔賑之 內供

奉官張承素為其父贈豐州觀察使宗貴立神道碑上

曰中官立碑恐無此例如李神福竇神興曾立碑即可

此見會要李竇立碑事當考

兩浙福建荆湖廣南諸州循偽制輸

丁身錢歲凡四十五萬四百貫民有子者或棄不養或賣為僮奴或度為釋老秋七月壬申朔詔悉除之

癸酉歷代帝王陵寢申禁樵採犯者所在官司並論其罪

丙子詔自今應差文武臣僚充安撫使副巡檢都監及提點刑獄之類但係同差帶職名者並令一班辭見合重行異位即依常例

崇真資聖禪院市蔬擾人丁丑詔以蔬圃賜之

庚辰上謂輔臣曰昨覃慶中外遷官惟入內內侍省內侍省官若依例改轉即勤惰勞逸不能均矣因取兩司官姓名較其入仕久近幹事繁簡第升降之遂詔從祀至陞上河中府入仕及十年者至西京入仕及十五年

者留司掌事入仕及十七年者並與改轉將命在外者並如之其請長假及事故入仕未滿限者量增奉給內諸司使有子者恩例外更特與改轉一人 詔獎淮南

江浙荆湖制置發運使李溥兩浙轉運使陳堯佐荆湖南路轉運使孫冕知温州胡則知郴州袁延慶知濠州定遠縣王仲微以規畫供修玉清昭應宮材木無闕故也

袁延慶未見

詳定所言皇帝臨軒冊五嶽叅詳冊文無

作樂之儀上曰凡大朝會公卿出入尚作樂且禮緣人

情宜令有司別撰樂章王旦曰冊案當於門外設次俟
入則樂作從之 詔丁謂李宗諤與禮官詳定五嶽衣
冠制度及宗飾神像之禮

壬午進封韓國長公主為衛國吳國長公主為楚國隨
國長公主為越國

甲申詔中書樞密院除改皇親檢行恩例自今凡進卷
草並臣僚親封朕當面拆之即降處分時皇親加恩制
未出有傳知者帝意內省見之遽即令進名付學士院

草制次日始進覆狀又降此詔

羣牧副使閻承翰與勾當估馬司趙守倫雖素為姻家
又聯職任然不相得遂各訟訴並付御史臺鞠問承翰
坐擅用公錢當贖金三十斤守倫坐違制移估馬司當
免所居官典吏當杖脊乙酉詔寬其罰承翰贖金十斤
守倫贖二十斤典吏亦降從杖羣牧都監張繼能判官
陳越而下並釋罪制置使陳堯叟特免按問所用公錢
悉蠲之

戊子鎮眉昌等州皆言地震契丹界自應州而北地震裂有聲室宇摧圯人多壓死上曰此必遼境民災宜諭邊臣常為之備因議擇河北轉運使經度軍儲備緩急謂輔臣曰王曙淳厚李應機幹敏皆可委也乃以曙為轉運使應機為同轉運使開封府進士郭顏孫碩等同保應服勤詞學科碩預薦顏既被絀詣府自首有服紀不當赴舉欲以累碩上惡其險躁無儒行令配蔡州永勿齒貢籍碩等五人贖金殿三舉

己丑詔河北濱棣州水潦為患比降赦命免其田租十之三今所納七分可更蠲其半 三司假內藏庫絹三十萬匹從之 泉州觀察使駙馬柴宗慶表求邊任上謂輔臣曰宗慶未嘗更事豈堪此選卿等可召至中書諭以疆場無虞恐動人情故不許也

辛卯河南府言有蝗自死不害稼 京東轉運使言蝗生食苗葉不傷穗 國史院進所修太祖紀上錄紀中義例未當者二十餘條謂王旦王欽若等曰如以鐘鼓

樓為漏室密務為甄官豈若直指其名也悉宜改正之
欽若曰此蓋晁迥楊億所修上曰卿嘗參之耶旦曰朝
廷撰集大典並當悉心務令廣備初無彼此之別也因
詔每卷自今先奏草本編修官及同修史官其初修或
再看詳皆具載其名如有改正增益事件字數亦各於
名下題出以考其勤惰焉

工部尚書參知政事馮拯以疾求辭優詔不許且作詩
諭意拯復三表固請甲午罷為刑部尚書知河南府知

西京留守司事仍令委事官屬聽養疾自便 知樞密院事王欽若言近者王公車輅皆飾以龍顏素纓制請下太常禮院檢詳以其法付太僕寺重修永為定式使尊卑不瀆從之

八月壬寅朔捧日右廂都指揮使王潛等七人各授諸州團練使刺史赴本任仍令審官院擇官為通判 增給諸王府公用錢相王舒王歲萬三千貫榮王萬貫

上謂宰相曰朝廷宜守經制儻務更張則攀援者衆乃

知命令之出不可不謹今言某事有利輕為釐革始則皆以為當久乃翻成有害洎加裁正是朝令夕改也又涖官之人不可過為寬恕以致弛慢或探求罪惡不顧煩擾抑又甚矣王旦曰古人有言法出而弊作令下而姦生寬則民慢陷法者多猛則民殘無所措手足正為此也 詔樞密院凡軍校轉員諸班都虞候料錢及三十貫者並與除遙郡刺史 開封府言咸平中牟二縣蝗

初龍圖閣直學士陳彭年言前所頒諸路發解條式與
禮部新格不同慮官吏惑於行用望申明之詔翰林學
士晁迥等重加詳定癸卯迥等上其書乃頒於諸路
甲辰兗州言蚘蟲生有蟲青色隨齧之化為水時謂旁
不肯蟲上謂宰相曰昨遣人潛視東畿苗稼大率所傷
不過三四分王旦曰陛下憂民之切上天固當垂祐矧
連歲豐稔今茲小損亦未至失所也

丙午詔外任官負罪衝替及別與差遣者詔到所在權

差官代之即使離任 令諸路除畬田依舊俗外勿非
時火田以傷生類 右諫議大夫知廣州楊覃勤於吏
事所至以幹局稱南海有番舶之利前後牧守或致謗
議覃循謹清介遠人宜之及卒有洒泣者

丁未復置廣濟河催綱朝臣是職舊命常參官近歲省
去止用使臣而州郡皆不承稟故復之 祀汾陰考制
度使馮起等言陝州湖城縣民張化基閭用和楊忠並
累世同居詔旌其門閭

庚戌以汾陰禮成曲宴宗室輔臣於後苑賜衣帶器幣
有差時刑部尚書馮拯新解政事特召預會賜予同輔
臣 荊州言南和縣荒地租黍自生約二十頃頗濟饑
民

癸丑贈懷州防禦使河內侯惟叙卒有司言惟叙於上
為再從姪無臨喪制服之禮上特行焉時榮王元儼生
辰伊邇上曰朕已諭元儼若開宴宜改擇日王旦曰但
不舉樂於禮亦無嫌也

明道二年九月贈保
靜留後高平郡公

丙辰錄唐長孫無忌段秀實等孫授以三班借職 祖
宗以來兩省御史臺官須文學優長政治尤異者乃特
除拜汾陰肆赦始以叙遷上恐循習非便乃詔自今遵
守舊制不得以他官轉入其東頭供奉官至閣門祇候
高品至殿頭內供奉官至崇班亦不得一例遷授其合
陞改者當優與差遣增其俸給 三司使丁謂言東封
及汾陰賞賜億萬加以蠲復諸路租賦除免口算聖澤
寬大恐有司經費不給上曰國家所務正為澤及下民

但敦本抑末節用謹度自當富足矣

丁巳詔文武官有言刑政得失邊防機事者並賜對其餘細務令條列以聞

辛酉令淮南轉運使安集滁和等州流民

癸亥甘州輝和爾可汗王伊嚕格勒遣使奉表詣闕初伊嚕格勒屢與夏州接戰每遣使入貢即為趙德明所掠至是總嚕爾等族皆感朝恩遣人防援而至焉

乙丑刻御製大中祥符頌於左承天祥符門

戊辰河決通利軍合御河壞大名城傷田廬遣使發廩
米賑被水家人一斛又遣使詣滑州經度西岸開減水
河上謂宰相曰獻計者言疏治此河可以析水勢省民
力役成宜獎之

九月辛未朔以霖雨遣官分祈天地宗廟社稷在京神
祠寺觀京城民僦官舍者免其直三日賜諸軍薪蒸

壬申上作內藏庫銘

癸酉詔諸路州軍縣鎮文武官見居遠任家屬寓止者

如其子孫弟姪無賴不幹家業即嚴行約束苟不悛革則并其交游之輩劾罪以聞從樞密直學士劉綜之請

也

明年五月綜始知開封本傳以此事為綜在開封時所請恐誤也

乙亥免監內弓箭庫內園使暴政敏削一任同監官如京副使安繼昌特停官政敏坐私役公人上書不實繼昌素與政敏不協因遺庫吏錢使上書訟政敏故并責之

會要在十一月

丙子秘書監向敏中等請集御製藏於館閣從之仍詔

不得與太宗御集同處於是內出雜文篇什付敏中等各以類分其繼作即續附之

丁丑以霖雨未止遣官祈祀 涇原鈐轄曹瑋言隴山

外籠竿川熟戶蕃部以閑田輸官請於要害地立堡寨募弓箭手居之且言異時秦渭有警此必爭之地也詔

可

此年冬乃成

庚辰詔自今訴訟民年七十已上及廢疾者不得投牒並令以次家長代之若已自犯罪及孤獨者論如律

汾陰赦書諸路催欠司向來五日一次科責自今季
限比較區斷其官吏亦別議定從寬條制辛巳三司定
三分以上催欠官知州通判罰直之差凡三等三分以
下並免從之

壬午兩浙轉運使陳堯佐言淮南廬壽等州有流民至
常潤州已依詔旨發廩粟減直出糴 河陽言河溢于
溫縣

甲申曹瑋言趙德明遣軍校蘇守信領兵攻西涼策丹

族其首領斯多特會諸族禦之大敗其衆

乙酉詔諸州所閱老疾軍校補署未及三年者不須停免

丁亥詔殿前侍衛司宣徽院三司軍頭司自今以請託為名而率歛軍士緡錢其同謀及受贓並處斬軍校知情者連坐不知情者決配 三司鹽鐵副使林特上祀汾陰慶賜例冊上謂宰臣曰外道所給比往年南郊乃多十餘萬蓋募兵太廣爾其間老疾不任事者當令簡

閱之王旦曰言事者稱民間或有小歎及游手者皆宜
募置軍籍然一列軍門何由復業不若令田農有利自
致滋殖也上然之

戊子幸太一宮祈晴

己丑以工部郎中龍圖閣待制張知白為契丹國主生
辰使崇儀副使薛惟正副之兵部員外郎兼侍御史知
雜事趙湘為正旦使供奉官閤門祗候符承翰副之惟
正至幽州赴會飲射不如儀使還詔劾其罪

惟正承翰未見

蘇州言吳江汎溢壞廬舍詔遣使按視存卹仍詣廟致祭

辛卯命資政殿大學士刑部尚書向敏中為東嶽奉冊使兵部郎中龍圖閣待制孫奭副之工部侍郎集賢院學士薛映為南嶽奉冊使給事中錢惟演副之翰林學士工部侍郎知制誥晁迥為西嶽奉冊使刑部郎中龍圖閣待制查道副之禮部侍郎馮起為北嶽奉冊使太僕寺少卿裴莊副之右諫議大夫龍圖閣直學士陳彭

年為中獄奉冊使光祿少卿沈繼宗副之其玉冊如宗

廟謚冊之制

繼宗
倫子

癸巳御乾元樓觀酺凡五日

先是溫州甘子園及蓮池三司定課令本州配市丁酉
詔以其課給本州公用

冬十月辛丑遣使齎手詔勞問知河南府馮拯賜以茶
藥使還言拯奉詔感動涕泗交下

壬寅詔河北忠烈宣勇軍士本自戶籍選置其老疾者

召人承補然後歸農如聞承補之人或有逃亡官司復收錄農者充役甚無謂也自今不得更然

癸卯詔自今諸路州院司理院繫囚死者並遣他司官吏檢視防其枉抑也 軍頭引見司言諸色人邀車駕進封事悉無異見奇策又非枉抑但欲僥望恩澤請示條禁違者論其罪從之

丙午上謂王欽若曰每歲寒食初冬宮人上陵在路所須之物皆令預立定數蓋防其擾民如聞宗室諸宮歲

遣人拜掃所歷州縣過有呼索可切戒之

戊申有司設五嶽冊使一品鹵簿及授冊黃麾仗於乾元門外各依方所又設載冊輅及袞冕輿於乾元門外羣臣朝服序班仗衛如元會儀上服袞冕御乾元殿中書侍郎引五嶽玉冊尚衣奉袞冕升殿上為之興奉冊使副班于香案前侍中宣制曰今加上五嶽帝號遣卿等持節奉冊展禮咸承制再拜奉冊使以次升自東階受冊于御坐前降西階副使受袞冕于丹墀玉冊至乾

元門列黃麾仗設登歌奉冊於車袞冕於輿使副袴褶騎從遣官三十員前導及門奉置幄次以州長吏以下充祀官致祭畢奉冊袞冕置殿內

辛亥太常丞李經言州縣多冒夜秉燭杖罪人至有僱人受杖者望嚴行禁止從之

壬子詔如聞州縣社壇多不如禮至有縱民放牧臨祭之日始重修飾宜令禮官檢定制度頒下

甲寅詔自今決杖令衆者舊十日減為三日以上者勿

過五日暑月免之

丁巳上以江南淮南接壤而鹽酒之價不等令三司與江淮制置發運使李溥規定以聞有司執言慮失歲課上曰苟便於民何顧歲入也

丙寅召輔臣至苑中山亭觀太宗聖製及四部書由玉宸殿佛閣至東西洞觀古書讀御製書籍記石上作詩王旦等賦和

丁卯白波發運判官史瑩言孟州汜水縣孤栢嶺下緣

南岸山址導河入汴甚為便利詔勾當汴口楊守遵與瑩偕往經度守遵言役大而流悍非人力可禦又詔內侍副都知閻承翰覆視承翰亦言其不可遂罷承翰因請浚四渠於汴水下流以防潰溢從之

承翰乞浚四渠實錄在四月庚

申今從會要并書於此

戊辰詔修玉清昭應宮使丁謂同修宮使李宗諤副使劉承珪都監藍繼宗視內殿功德及御書因命宴而承珪繼宗賜食于別次上作詩賜謂等初冠準在中書多

召兩制會飲私第酒酣氣盛必閉關苛留之往往侵夜
畏謹者甚憚焉宗諤嘗預會日既夕矣而關不可啓遂
於門扉下竊出得馬以走於是上勸宗諤酒宗諤堅辭
以醉且云日暮上令中使附耳語云此間不須從門扉
下出宗諤皇恐致謝上笑而頷之因謂宗諤曰聞卿至
孝宗族頗多長幼雍睦朕嗣守二聖基業亦如卿輩之
保守門戶也宗諤頓首謝上又曰翰林清華之地前賢
數歷多有故事卿父子為之必周知也宗諤嘗著翰林

雜記國朝新制翌日上之手詔褒荅命藏內署 殿中

侍御史薛奎性剛不苟合遇事敢言上時數宴大臣至

有霑醉者奎諫曰陛下嗣位之初勤心萬務而簡於燕

幸今天下誠無事而飲樂無度又大臣數被酒無威儀

非所以為朝廷重也上善其言

奎諫附此奎除殿中不
得其時今年十一月乃

以殿中判磨勘司明
年二月遂出為陝漕

己巳西涼府六谷都首領斯多特遣錫喇卜薩木丹來貢賜

紫方袍

是月詔諸司所奏公事並須同官商議無得各執異見
上諭王欽若等曰昨日殿前都指揮使曹璨奏本司
孔目官出職其以次勾押官亦乞一例出充班行且殿
前侍衛諸司孔目官已下皆掌軍兵之事若散令出職
事亦非便况曾降宣命條約並令轉至孔目官五周年
年及五十已上方許出職安排樞密院當誌之不可輒
隳此制仍明諭曹璨知之 初置牧養病馬 江淮發
運使文思使李溥自陳年終漕輦之績詔示王欽若等

特改北作坊使以酬之

此據會要

三司言衣庫使監權貨

務安守忠一界收到出剩課利萬數至多覆之皆實詔

特改軍器庫使

此亦據會要

詔先差內品往諸州勾當場

務其內品皆是克復廣南後即選識字彊明者任之今
老不任事若別用後生者多不能幹集自今有內品負
闕精加選擇如闕人即改差使臣

十一月庚午朔詔聞河朔諸州解送舉人艱於考覈頗
多黜落令轉運使於落解舉人至多處遣官別加考試

合格人送禮部 占城國遣使貢獅子

甲戌詔河中府進士五舉諸州諸科終場七舉已上特許禮部奏名伊魯格勒遣使言敗趙德明乞賞其立功首領詔付空名司戈司階郎將十道使承制補署之

先是汾陰赦書舉服勤詞學經明行修之士如東封例准不覆考丙子上御崇政殿親試進士扣殿檻請諭詩賦論題所出上令錄示之始令賦論中不得用小臣儒有字又以冬晝景短罷常務不決即令引試內出新定

條制舉人納試卷內臣收之先付編排官去其卷首鄉貫狀以字號第之付彌封官謄寫校勘用御書院印始付考官定等訖復彌封送覆考官再定等編排官閱其同異未同者再考之如復不同即以相附近者為定始取鄉貫狀字號合之乃第其姓名差次并試卷以聞遂臨軒唱第其考第之制學識優長詞理精絕為第一等才思該通文理周密為第二等文理俱通為第三等文理中平為第四等文理踈淺為第五等自餘率如貢院

舊制賜進士張師德等二十一人及第十人同出身諸科及第者四十二人同出身者八人師德去華子也

汾陰路多獻文章者庚辰詔以前均州參軍許洞前彰武節度推官解旦等九人姓名付中書令召試中書言旦及進士范本陳矩詞學可采授旦著作郎本賜及第

矩出身

洞蘇州人

辛巳詔自今知貢舉及發解官並令門辭遣官伴送入院不得更求上殿及進呈題目

壬午知河南府馮拯言官市芻粟望增給其直陳堯叟
曰增直以市不若徙馬他所京師馬舊留二萬今留七
千自餘悉付外監仍欲於七千之中更以四千付淳澤
監歲可省芻粟三百餘萬若有給賜朝取夕至矣從之
會要於明年四月始載堯叟言又馬數不同今從實錄

上又曰馬及十萬當且止也王旦曰聽民間畜養官中緩急以本直市之猶外
廐爾且所費芻粟皆出兩稅少損馬食用資軍儲亦當
世之切務馬知節曰馬多不精若十萬匹選可用者當

得四五萬耳多畜鴛弱其費愈甚上然之

實錄載上云馬數十萬可

止在六年二月今從寶訓并書之

癸未諸路轉運提點刑獄安撫等司自今不得牒監場務京朝官使臣令體量州縣官吏以其統攝之下言多不實故也工部侍郎种放屢至闕下俄復還山人有貽書嘲其出處之迹且勸以亟辭祿位居壘谷放不荅放終身不娶尤惡囂雜故京城賜第為擇僻處然祿賜既優晚節頗飾輿服於長安廣置良田歲利甚溥亦有

疆市者遂致爭訟門人族屬依倚恣橫王嗣宗之出守長安始甚敬放放被酒稍倨嗣宗怒以語譏放放曰吾不猶愈乎角力而中第乎初嗣宗就試講武殿嘗因戲弁擢首科故放及之嗣宗媿憾因上疏言所部魚弁之家侵漁衆民凌暴孤寡凡十餘族而放為之首且述放弟姪無賴據林麓樵採周回二百餘里奪編氓厚利願以臣疏下放而賜放終南田百畝徙放嵩山疏辭極其醜詆目放為魑魅且屢遣人責放不法上方待放厚詔

工部郎中施護推究會赦恩而止於是放自乞徙居嵩
山天封觀側詔遣內侍就興唐觀基起第賜之假踰百
日續給其奉然猶往來終南按視田畝每行必給驛乘
在道或親詬驛吏規算糧具之直時議浸薄焉

王嗣宗傳云令

放徙嵩山以避之按今年正月嗣宗已有命徙邠州放
四月方還終南及今乃徙居然則徙居不緣避嗣宗也

傳語
誤

壬辰詔華州管內靈蹟並禁樵採

癸巳封駙馬都尉柴宗慶母穆氏為河南郡君宗慶以

母為嫂故不得封衛國長公主數有陳乞乃特封之

甲午契丹國主遣使右威衛上將軍蕭昌琬副使衛尉卿王寧來賀承天節

乙未免雄霸莫州信安乾寧保定軍今年秋租十之七
法官言准赦詳律令制書有失於重者四條請減定
從之

戊戌詔加上東嶽淑明后南嶽景明后西嶽肅明后北
嶽靖明后中嶽貞明后之號仍遣官祭告

是月詔選使臣一人管勾故太師趙普家事普妻和氏

卒因其家自請而從之

三朝實訓卹舊族云趙普妻卒上令中使錄其家貲數甚廣因

謂左右曰普夫妻儉嗇致此儲蓄其子承宗已卒承煦尚幼當遣使臣為主家務無令散失按承宗死於淳化二年承煦時已二十八歲今不得云尚幼蓋實訓潤文遂失事實耳今但從會要

十二月庚子朔以左領軍衛大將軍楊瓊知兗州有州卒自言得神術能飛行空中州人頗惑瓊捕至折其足奏戮之衆伏其明

壬寅變州路轉運使言近置暗利寨有為惡蠻人能率

屬歸投者署其首領職名月給食鹽詔可 詔三禮三
傳科自今各減一場仍以五通為合格

乙巳詔楚泰等州民為湖水害稼者給復其租沒溺者
人賜千錢米一斛

戊申太常博士江嗣宗言陛下躬臨庶政十有五年殿
廷間事一取聖斷有勞宸慮今請禮樂征伐大事出於
一人自餘細務委任大臣百司上曰此頗識大體乃詔
褒嗣宗從其所請

江嗣宗
未見

知河南府馮拯言天慶節

公費錢不充詔歲增十萬 江淮發運使邵晔言先准
詔江淮路以廩粟賑貸及減價出糶者凡二十萬石
庚戌兵部郎中龍圖閣待制孫奭以親老解官歸侍不
許

辛亥幸殿前班召從臣觀騎士習武藝賜物有差遂幸
潛龍園宴射 上封者言京城殺禽鳥水族以供食饌
其數甚廣有傷生理望賜條約上曰如聞內廷及皇親
諸縣市此物者尤衆可令入內侍省內東門司嚴加

約束庶乎自內及外使民知禁也

甲寅判太常禮院孫奭言準禮冬至祀圜丘有司攝事以天神六百九十位從祀今惟有五方上帝及五人帝五人神十七位天皇大帝以下並不設位且太昊句芒惟孟夏雩祀季秋大享及之今乃祀於冬至恐未叶宜詔兩制及崇文院詳定翰林學士晁迥等言按開寶通禮圜丘有司攝事祀昊天配帝日月五星中宮外宮衆星總六百八十七位雩祀大饗昊天配帝五天五帝五

官總十七位方丘祭皇地祇配帝神州嶽鎮海瀆七十一位今司天監所設圜丘雩祀明堂並十七位方丘七十一位即是方丘有嶽瀆從祀圜丘無星辰而反以五人帝從祀參詳故事實為闕典望如輿所請以通禮神位為定其有增益者如後敕奏可

京城穀貴乙卯詔發惠民廩粟賤糶以濟之

庚申溪洞安遠順南永寧濁水等州蠻田承曉等三百七十二人來貢

甲子契丹遣使長寧節度使耶律漢寧副使太常少卿
張儉來賀明年正旦 詔京東諸州兵甲自來專委徐
州提轄疆界闊遠恐難管攝可據地勢分委徐州兗州
齊州知州提舉

是歲天下戶十三萬三千一百一十二口五十四萬一
千四百一十九